



“ Saya memang tak setuju. Contohnya macam Valet Doa. Dalam Islam tak ada sistem nak berdoa, kirim pada orang tolong doakan untuk kita. Tapi kita berdoa terus pada ALLAH SWT. Kalau ahli agama dah mengatakan perbuatan memanipulasi agama itu salah dan berdosa, maka ia tetap berdosa.” - Nurin Kamilia Asfarizal, 19, penuntut universiti



“ Niat untuk mendoakan itu baik tapi apabila dikenakan bayaran tertentu, keikhlasan tak ada. Islam itu tidak mendidik kita jadi seorang yang rakus serta membazir. Jangan kita merumitkan ajaran Islam itu sendiri.” - Abdul Hazli Zainol, 24, pegawai pemasaran



“ Terang-terang perbuatan itu salah di sisi agama. Contoh jual air penawar untuk kaut untung. Pengguna yang beli pun tidak sedar perbuatan itu salah.” - Amirul Syakirin Maliki, 19, penuntut universiti



“ Pada saya memang tak patut mereka gunakan agama untuk buat duit dengan cuba menghalalkan perbuatan yang salah. Jika betul nak membantu, kena ikhlas dan tak mengharapkan wang ringgit.” - Muhammad Aidil Aqmal Md Idris, 19, penuntut universiti



“ Otak orang berniaga ni kadang-kadang tak logik dan tak bertanggungjawab sampai sanggup memperjudikan agama demi mengaut keuntungan dengan mudah dan pantas. Tanpa mereka sedari nama agama digadai.” - Sukri Shaari, 50, bekerja sendiri



“ Mereka yang memanipulasi agama ini mungkin hanya fikir soal duit saja dan menggunakan alasan agama itu untuk kaut untung.” - Mohd Fakhrurazi Othman, 19, penuntut universiti



“ Dengan menipu ingat boleh kaya cepat? Rezeki tak berkat. Islam tak pernah mengajar umatnya berbohong.” - Abdul Muiz Yahya, 32, penyelia tapak



“ Tak patut guna nama agama untuk kaut keuntungan. Agama bukan bahan dagangan. Ingat balasan ALLAH jika menganiaya orang lain.” - Hayati Ismail, 59, suri rumah

reaksi

Manipulasi agama

Nama agama dijadikan bahan dagangan untuk mengaut untung. Demi mendapat kesenangan yang sementara, benteng agama yang sepatutnya mampu menjadi pendinding dan pengawal buat diri, digadai, dirobah dan dihancurkan.

Dengan bermodalkan nama Islamik, agama terus dipergunakan untuk habuan dunia dan juga kepentingan peribadi. Bahkan jenayah ini menyusup dalam masyarakat bermodalkan istilah patuh syariah. Terbaru, Islam diperkuda lagi dengan perniagaan Valet Doa atau 'upah doa' yang secara terang-terangan mengeksploitasi ibadah.

Umat Islam seharusnya sedar tiada jalan pintas untuk ke syurga kerana Islam ialah agama yang benar-benar mengikut neraca syariat.



“Orang zaman sekarang guna nama agama sebab taksub dengan nama agama tapi tak mahu belajar.” - Najibah Yahya, 25, pegawai khidmat pelanggan

“Sememangnya tindakan pihak-pihak yang menunggang agama untuk keuntungan ini tidak wajar dilakukan, tapi kita juga perlu melihat dari aspek perniagaan yakni konsep permintaan dan penawaran. Perniagaan berteraskan tunggangan agama ini tidak akan wujud sekiranya tiada permintaan dari pelanggan. Maka kewujudan mereka adalah refleksi mentaliti warga Malaysia itu sendiri yang masih berterusan menyokong dan membeli produk-produk tersebut.”

- Muhammad Akram Abdul Aziz, 32, peguam

“Tiada jalan singkat untuk ke syurga, jadi kita tak perlu 'orang tengah' untuk bantu kita berdoa. Kita ada ALLAH yang Maha Mendengar setiap doa hambaNYA.” - Fazirah Kassim, 61, pesara kerajaan



“Rasulullah tidak ajar kita untuk menjual agama. Ayat al-Quran boleh digunakan untuk kebaikan diri sendiri tetapi apabila dijual dan dijadikan sebagai keuntungan wang ringgit, ia tidak sepatutnya berlaku.” - Arsad Abd Rahman, 57, pesara tentera laut

“Islam itu mudah. Ada yang segelintir tahu, perkara yang dibuat itu salah tapi tetap buat juga. Mereka cuba gunakan agama untuk mendapatkan sesuatu.”

- Muhammad Aiman Faiz Hidayat Mohd Fauzi, 19, penuntut universiti



“Pada pendapat saya, mereka ini adalah oportunist. Namun terdapat nilai negatif dalam sifat positif ini kerana hilangnya batas di mana usaha harus ditumpukan. Memang setiap doktrin kepercayaan menggalakkan manusia berdikari, berusaha sendiri dalam hampir semua aspek kehidupan, namun ada hadnya tertakluk pada sifat kemanusiaan, penghormatan dan pada dasar logik. Ketinggian rasa hormat pada agama haruslah lebih tinggi dari keinginan mencari dan merebut peluang ke arah hanya manfaat eksklusif individu.” - Fahirul Ramli, 37, penulis

“Menggunakan agama untuk meraih keuntungan semata-mata bagi kepentingan sendiri merupakan satu tindakan yang tidak wajar. Agama kita tidak boleh dinilai dengan wang ringgit. Apa yang perlu adalah dilakukan dengan keikhlasan hati. Islam itu mudah.” - Mohd Asraf Zainol, 23, pekerja am



“Orang Islam sepatutnya celik dengan pengetahuan agama supaya tidak mudah terpengaruh dengan promosi-promosi Islamik yang jelas hanya mengaut keuntungan.” - Muhammad Harun, 63, pesara kerajaan



“Bagi saya sebagai pelajar jurusan sains dan bakal perubatan. Tidak salah untuk menjual air bacaan doa, yasin dan al-Quran yang lain kerana terbukti oleh kajian seorang bukan Islam, Dr Masaru Emoto bahawa air yang dibaca perkataan baik molekulnya berubah dan juga perkataan tidak baik. Cuma pihak penjual perlu menjual pada harga yang berpatutan dan tidak mementingkan keuntungan dan niat kerana ALLAH.” - Muhammad Safiuddin Joon, 20, pelajar MSU